

增修萬縣志卷一

天文志

星野

黃帝畫壘分州而作星官書至高陽氏使南正重司天北正黎司地此星野所由昉歟後世分區配星或以州或以國或以郡不及縣者其微難知也萬於漢晉屬巴入參於唐自爲州入井鬼於宋明屬夔入井鬼於

國朝屬夔入翼軫夫地闢於古星增於舊自三代以來

萬縣志

卷一

天文志

星野

未始有推步若

本朝之精者也謹遵

大清一統志而臚歷代史同異著於篇令求萬次者知所折衷焉

萬縣夔州府屬分星翼軫次鶉尾

史記天官書觜觶參益州前漢書天文志觜觶參益州地理志秦地於天官東井輿鬼之分野也南有巴蜀廣漢犍爲武都後漢書天文志軫爲秦蜀華陽國志巴志仰稟參伐又云其分野輿鬼東井晉書天文

志陳卓范蠡鬼谷先生張良諸葛亮譙周京房張衡  
並云觜參魏益州巴郡入參八度地理志蜀郡巴郡  
之地總爲鶉首分隋書天文志梁州於天官上應參  
之宿新唐書天文志東井輿鬼鶉首也西南盡巴蜀  
漢中之地翼軫鶉尾也自房陵白帝而東盡漢之南  
郡地理志峽歸夔澧爲鶉尾分開忠萬涪爲鶉首分  
五代史鶉首秦分也蜀雖屬秦乃極南之表爾前世  
火入鬼其應多在秦宋史益梓利夔四路分井鬼又  
曰東井輿鬼鶉首也盡巴蜀漢中之地明史天文志  
萬縣志

卷一

天文志 星野

二

四川布政司所屬惟縣州皆分合州參分餘皆井鬼  
分

大清一統志四川夔州府翼軫分野鶉尾之次

按漢書天文志沿史記之誤地理志近是顧一書而  
自歧其說矣華陽國志蜀志及隋書畧有異同惟後  
漢志與諸書迥異然皆舉全蜀言之未嘗析指某郡  
爲某星次也晉志於郡國所入宿度分數特詳第書  
成於唐所紀者晉而所指之郡國皆漢名在晉夔白  
郡在漢夔隸巴郡相距千餘里昔人譏其支離穿

鑿以求合乎天官書卽巴郡入參八分之說尙不足據於夔更無當也五代史云蜀雖屬秦乃極南之表意頗疑蜀不盡鶉首之次而未明言宋史明指益梓利夔四路分井鬼宜若可據但其時夔州路所統者廣如渝忠等處皆井鬼分史祇括舉一路之大概而言明史時代較近堪資考證乃多襲舊說未盡釐正惟新唐書天文志謂自白帝而東屬翼軫分鶉尾次推步最爲精當實指白帝之名於夔之星野尤足徵信而地理志又謂利集壁巴蓬通開忠萬涪園果渠爲鶉首分則萬與夔星次各異詳其文義自白帝以東屬鶉尾次萬在白帝以西似與夔各爲分野我朝璣衡精密數理周詳度越前代康熙十三年監臣南懷仁撰恆星經緯度表用黃赤經緯互推乃得二十八宿度分之準乾隆九年監臣戴進賢等據新測以證舊經增星一千六百一十有四凡赤黃經緯去極入宿之度釐然可考一統志載夔州府翼軫分鶉尾之次蓋夔統於蜀而實與楚近故全川多屬鶉首次惟夔郡與綏定府西陽州石砬廳則屬鶉尾之次

萬縣志

卷一

天文志

星野

三

與新唐書天文志合惟各邑宿度例不分載無由剖  
決昔人謂星野有因天運而變者有因人事而變者  
自唐迄今歲差所積宿度遷移考唐志自井十二度  
至柳六度屬鶉首自張十五度至軫九度屬鶉尾明  
志自井九度至柳三度爲鶉首次自張十六度至軫  
九度爲鶉尾次唐志較晉天文志所載宿度已殊至  
明鶉首之次凡遷六度鶉尾之次遷一度萬與夔適  
當鶉首鶉尾之交歷久則度遷度遷則星移星移則  
度徙此天運之變也至於天象之昭垂原以察人事

### 萬縣志

#### 卷一

天文志

星野

四

之得失方今天下一家郡之於縣如臂使指休咎徵  
應詎同隔膜故縣無專宿祇統於郡萬在昔別爲州  
今則隸於夔此人事之變也而天運卽與乎合參觀  
天人相與自當適一統志與夔郡同屬翼軫分野  
鶉尾之次爲正而存唐志所說以俟博雅參考焉  
愚按周禮保章氏以星土辨九州之地所分封域皆  
有分星以觀妖祥尙矣然自九州星土書亡後世以  
十二國分野上屬二十八宿述天官者疑之又况析  
及郡縣歟益吾不知其爲參爲井也夔吾不知其爲

軫爲翼也萬吾不知其爲井鬼爲翼軫也余讀漢書天文志述史記觜觿參益州又曰觜觿梁也又曰參梁也晉書自畢十二度至東井十五度爲實沈魏之分野屬益州此以參屬魏兼屬蜀也而魏書天象志參魏分又曰參主兵政晉魏墟也則謂參屬魏不屬蜀也余讀漢書地理志秦地東井輿鬼之分野巴蜀益州屬焉唐書天文志東井據百川上流故鶉首爲秦蜀墟此以井鬼屬秦兼屬蜀也而史記東井輿鬼雍州後漢書東井秦地晉書東井輿鬼秦雍州隋書

萬縣志

卷一

天文志

星野

五

井爲秦分則謂井鬼屬秦不屬蜀也余讀後漢書翼軫爲楚又曰軫爲秦蜀此以軫屬秦楚兼屬蜀也而史記翼軫荆州漢書楚地翼軫之分野晉書翼軫楚荆州魏書翼軫南宮之蕃又荆州也隋書自張十七度至軫十一度爲鶉尾楚之分野則謂翼軫屬楚不屬蜀也此卽全蜀論之爲參爲井爲鬼爲翼軫吾不得而知也有合夔萬以配參者晉書巴郡入參八度巴郡統胸忍魚復者有合夔萬以配井鬼者宋史益梓利夔四路分井鬼夔路統達涪萬開者有分夔萬

以配井鬼翼軫者新唐書山南道夔鶉尾分萬鶉首  
分此卽夔萬論之爲參爲井爲鬼爲翼軫吾尤不得  
而知也參之爲蜀分也井鬼之爲蜀分也實沈鶉首  
之在西南也吾知之矣然水火合於參梁何以亡五  
星聚東井漢何以興吾不得而知也萬之爲井鬼也  
夔之爲翼軫也鶉首鶉尾之交南浦雲安之會也吾  
知之矣然歲差於上斗末或變爲牛初里差於下汴  
南或徙於河北吾不得而知也夔爲井鬼萬屬夔而  
亦爲井鬼也夔爲翼軫萬屬夔而亦爲翼軫也魏徙

萬縣志

卷一

天文志

星野

六

大梁則西河合於東井秦拔宜陽而上黨入於輿鬼  
人事之變星家之驗也吾知之矣然屬郡不百年而  
數更未因懸象而定經星附天體而不動豈以地理  
而移吾不得而知也然則竟不可知乎鄭康成有言  
九州分野之書既亡後世堪輿所書易涉於誕其誕  
者不可知吾於其精者知之

大清一統志夔綏酉陽石柱太平翼軫分夔無參萬無井  
鬼也夫前代分區配星密矣甘石唐都一行郭守敬  
之徒非不具卓見負絕識然而不能無生石其所據

疎也我

朝璣衡大備康熙乾隆間監臣撰恒星經緯度表增星  
千有六百

欽定歷象考成以歲差里差辨其次舍二十八宿之度分不  
失序而九州封域分星益得其準歷

列聖欽若折衷之勤以垂

皇朝敬授之紀復周官辨地分星之數以正屢代分野之  
疎推之人事妖祥起伏而不易向方驗之各直省日  
月剝蝕分數而不移晷刻蓋星野之精百世以俟而  
萬縣志

不惑矣然則夔爲翼軫萬與之爲翼軫所謂不得而  
知者庶其知之乎如曰萬不隸夔夔萬異宿隸夔夔  
萬同星不問其推步得失也吾又惡乎知之

卷一

天文志

星野

七

